



ROM SAPTA 8

J Glenn Calderwood

PNG Bible Resources

Rom Sapta 8

Sande Baibel Toktok

Painim ol wanwan tok

	Baibel Ves	Het Toktok	Pes
1	Rom 8:1-2	God i no save daunim yumi i pas long Jisas.	2
2	Rom 8:1-4	Tupela kain lo i stap.	3
3	Rom 8:5-11	Hanmak bilong Holi Spirit.	5
4	Rom 8:12-17	Paps bilong yumi.	7
5	Rom 8:18-25	Bai yumi kisim hevi.	9
6	Rom 8:26-27	Yumi no i stap wanpis.	12
7	Rom 8:28-30	God Em i kea long yumi.	14
8	Rom 8:31-34	Wanpela samting i no inap winim yumi.	16
9	Rom 8:35-39	God i lavim ol manmeri Em i kisim bek.	18

© 2018 J Glenn Calderwood CC BY-SA 4.0

Lukim www.pngbiblesources.org bilong kisim sampela tok moa.

God i no save daunim yumi i pas long Jisas.

Giaman, giaman, giaman. Long olgeta hap yumi save harim planti tok giaman. Long ples na long taun tok giaman i pulap nogut tru. Man i save mekim tok giaman long meri bilong em, na meri i save mekim tok giaman long man bilong em. Pikinini i save mekim tok giaman long papamama bilong em, na papamama i save mekim tok giaman long pikinini bilong ol. Bosman i mekim tok giaman long wokman bilong em, na wokman i save mekim tok giaman long bosman bilong em.

Na sampela taim yumi tu yumi save mekim tok giaman. Tok giaman i stap klostu long yumi olgeta manmeri bilong dispela graun. Na tok giaman i stap long bel na maus bilong yumi tu.

Em olsem na, mi lukim wanpela samting na dispela samting i olsem, planti manmeri i save bilipim na trastim tok bilong ol manmeri, na ol i tubel long tok bilong God.

Yumi tok pinis, tok giaman i pulap long planti manmeri, tasol God i no save mekim tok giaman. God i no save mekim wanpela tok giaman. Olgeta tok God i mekim i stret na tru olgeta. Mobeta yumi tubel long tok bilong ol manmeri na yumi *wanbel olgeta* long tok God i mekim long yumi na yumi bilipim na trastim na bihainim.

Skelim wanpela tok God i mekim long **Rom 8:1-2**. Planti manmeri ol i tubel tumas long dispela toktok bilong God na ol i tubel long ol narapela wankain tok i stap insait long Tok bilong God. Lukim na skelim dispela 2-pela Baibel ves long buk Rom.

¹ Olsem na, nau God i no save daunim manmeri i pas long Krai Jisas. ² Long wanem, Krai Jisas i bin mekim wok, na long dispela rot lo bilong Spirit bilong laip i mekim yumi fri long lo bilong sin na dai. Rom 8:1-2.

Bikpela tok na promis bilong God i olsem, God i no save daunim manmeri i pas long Krai Jisas. Na dispela tok i minim olsem,

- Yumi i pas long Jisas God i no inap kotim yumi long wanpela samting.
- Yumi i pas long Jisas God i no inap kotim na tilim pe nogut long yumi.
- Yumi i pas long Jisas yumi no inap lukim bel hat bilong God long sin bilong yumi.
- Yumi i pas long Jisas yumi no inap lus long paia long bihain.
- Yumi i pas long Jisas God i no inap mekim save long yumi long sin bilong yumi.

Tru tumas God i no inap daunim yumi manmeri i pas long Krai Jisas.

Na husat i pas long Krai Jisas? Manmeri i pas long Krai Jisas ol i save bilipim na trastim wok Jisas yet i bin mekim long diwai kros. Ol i bilipim na trastim God long kisim bek ol long wok bilong Jisas long diwai kros tasol. Ol i klia olsem God i no inap kisim bek ol long ol naispela wok bilong ol yet. Nogat. Ol i bilip olsem

God i kisim bek sinmanmeri long feifful wok bilong Jisas long diwai kros tasol. Long dispela as ol i pas olgeta long Jisas na ol i bilipim na trastim wok bilong Em na ol i stap aninit long Em.

Ol dispela manmeri ol i save amamas. Long wanem, God i no inap daunim ol long sin bilong ol. Nogat. Ol i fri long pe bilong sin bikos Jisas i bin mekim wok long diwai kros bilong friim ol long pe bilong sin.

Tasol sori tumas, planti manmeri i tubel long dispela tok bilong God. Em olsem na ol i no trastim God long kisim bek ol long feifful wok bilong Jisas long diwai kros. Nogat. Ol i tingim olsem, "Sapos mi kisim baptais na mi bihainim misin pasin na mi lukautim Sande na mi lukautim Sabat na mi wokim ol gutpela gutpela pasin, orait God i no inap daunim mi long ol sin bilong mi." Yu save, manmeri i bihainim dispela kain tingting na dispela kain bilip, orait ol i no pas long Krai Jisas. Ol i no trastim God long kisim bek ol long feifful wok bilong Jisas tasol. Ol i no trastim wok bilong Jisas. Olsem na ol i no pas long Jisas.

Manmeri i *no* pas long Jisas, orait God bai daunim ol. Tasol manmeri i pas long Jisas, orait God i no inap daunim ol na ol bai i stap seif aninit long feifful wok bilong Jisas.

Na bai yu trastim tok bilong husat? Bai yu trastim tok bilong God o bai yu trastim tok bilong ol manmeri?

Tingim. God i no inap giamanim yu long wanpela samting, tasol ol manmeri inap long giamanim yu long planti samting. Olsem wanem bai yu putim laip bilong yu long han bilong manmeri i save mekim tok giaman?

Yumi sinmanmeri yumi mas putim laip bilong yumi long han bilong God tasol na yumi trastim tok bilong God tasol, na trastim God long bihainim tok bilong Em yet na kisim bek yumi long feifful wok bilong Jisas long diwai kros tasol.

Tupela kain lo i stap.

Yumi save pinis, insait long Baibel i gat ol planti lo i stap. Long Olpela Testamen God i givim Lo long Moses na namba bilong ol dispela lo i winim 600. Sampela taim yumi tok, "God i givim Moses 10-pela lo." Na dispela tok i tru. Tasol yumi no ken i lusim o haitim ol narapela lo God i givim Moses. Nogat. Ol lo God i givim Moses i winim 600 na taim yumi tingim na skelim Lo bilong God, orait yumi mas tingim na skelim olgeta lo God i givim.

Tasol sapos yumi skelim dispela 10-pela lo tasol, orait ating yumi ken i kisim bikpela sem. Long wanem, yumi no save bihainim gut ol dispela 10-pela lo. Olgeta taim yumi save feil long ol dispela 10-pela lo. Na sapos yumi skelim olgeta 600 lo, orait bai yumi kisim bikpela sem moa moa yet. Long wanem, yumi feil long ol planti lo bilong God na yumi ken i save olsem, yumi no stretpela manmeri long ai bilong God. Lukim **Rom 3:19-20**.

¹⁹ Yumi save pinis, olgeta tok lo i mekim em i mekim long ol manmeri i stap aninit long lo. Na tok bilong lo i stap bilong pasim maus bilong olgeta manmeri, bai olgeta manmeri bilong olgeta hap bilong dispela graun i sanap long kot bilong God. ²⁰ Long wanem, i no gat wanpela manmeri bai i kamap stretpela manmeri long ai bilong God long rot bilong bihainim lo. Nogat. Long rot bilong bihainim lo ol manmeri bai klia long sin bilong ol yet na em tasol. Rom 3:19-20.

Tru tumas, sapos yumi tingim na skelim *olgeta* lo bilong God, orait ating yumi bai pasim maus na daunim het na sindaun kwait tasol. Long wanem, yumi ken i save olsem, yumi no gutpela manmeri long ai bilong God. Nogat. Yumi feil manmeri tasol na yumi sin manmeri tasol. Olsem na, yumi no ken i opim maus na tokim God olsem, “God, mi gutpela man, olsem na, Yu ken i kisim bek mi.”

Tasol tenkyu tru long God. Em i kamapim wanpela rot bilong helpim yumi feil manmeri. Lukim tok i stap long **Rom 8:1-4**.

¹ Olsem na, nau God i no save daunim manmeri i pas long Krai Jisas. ² Long wanem, Krai Jisas i bin mekim wok, na long dispela rot lo bilong Spirit bilong laip i mekim yumi fri long lo bilong sin na dai. ³ Yumi no gat strong long bihainim lo, na long dispela as lo i no kamapim laip long yumi. Tasol samting lo i no inap mekim God yet i mekim. God i salim Pikinini bilong Em yet i kam. Em i kamap man olsem yumi manmeri i mekim sin, na Em i kam bilong mekim wok long sin. Em olsem na long bodi bilong Pikinini bilong Em, God i daunim sin. ⁴ God i mekim olsem bai olgeta stretpela pasin bilong lo bai kamap long laip bilong yumi i no laik bihainim pasin bilong olupela bel na i laik bihainim laik bilong Holi Sprit. Rom 8:1-4.

Aposel Pol i tokaut long 2-pela kain lo i stap, lo bilong Spirit bilong laip na lo bilong sin na dai.

Lo bilong sin na dai.

Taim Pol i tokaut long “lo bilong sin na dai”, orait em i tokaut long ol lo bilong God. Lo bilong God i gutpela gutpela samting tru, tasol yumi save feil long bihainim olgeta lo bilong God olgeta taim. Em olsem na, taim yumi feil long bihainim lo bilong God, orait yumi wokim sin. Na pe bilong sin em i dai. Em olsem na, Pol i makim lo bilong God na em i tok, “lo bilong sin na dai.”

Lo bilong Spirit bilong laip.

Na “lo bilong Spirit bilong laip” em i gutnius bilong God. Gutnius bilong God i tokaut long wok God i bin mekim long dai bilong Krai long diwai kros bilong kisim bek sin manmeri. Spirit bilong God i save opim ai na ia na bel bilong sinmanmeri na long dispela as sinmanmeri i ken i tanim bel na bilipim na trastim feitful wok bilong Jisas long diwai kros na pas long Krai. Em olsem na, Spirit bilong God i kisim sinmanmeri i kam long Krai na wok bilong Krai long diwai kros i sevim laip bilong ol. Em olsem na, long dispela as Pol i tokaut olsem, “lo bilong Spirit bilong laip”.

Lo bilong Spirit bilong laip i mekim yumi fri long lo bilong sin na dai.

Pastaim Pol i tok olsem, God i no save kotim na daunim manmeri i pas tru long Krai. Long wanem? Krai i bin mekim wok bilong manmeri i pas long Em, na dispela wok i friim ol long lo bilong sin na dai. Lo bilong sin na dai i tok olsem, “Yu mekim sin, orait bai yu sanap long kot na kisim pe bilong sin, bai yu dai, bai yu lus long hel.” Wok bilong Krai i friim yumi long dispela samting.

God i bin salim Krai i kam na Em i kamap man olsem yu na mi, na Em i dai bilong friim yumi long toktok bilong lo bilong sin na dai. Krai i bin kisim dai bilong yumi, Krai i bin kisim pe bilong sin bilong yumi, bai

yumi no inap kisim, bai yumi stap fri long dispela samting. Em olsem na toktok bilong lo i no inap holim moa yumi i pas long Krai.

Lo i tok, "Yu gat sin, orait bai yu dai." Taim Krai i kisim sin bilong yumi, orait Em i kisim ples bilong yumi, na toktok bilong lo i holim Krai na long dispela as Krai Em i dai. Olsem na, long dispela as toktok bilong lo i no inap holim yumi. Krai i bihainim olgeta toktok bilong lo na long dispela as Krai Em i stretpela man truru. Dispela stretpela pasin Krai i mekim em i mekim bilong yumi i pas long Em. Long dispela as God i save kolim yumi i pas long Jisas "stretpela manmeri." Long ai bilong God i olsem yumi bin bihainim olgeta toktok bilong lo.

Em olsem na, yumi i pas long Krai yumi no ken i pret long lo bilong God. Nogat. Yumi ken i amamas. Long wanem, lo bilong Spirit bilong laip i mekim yumi fri long lo bilong sin na dai. Long wok bilong Jisas long diwai kros God i ken i kolim yumi stretpela manmeri, na long dispela rot Em i kisim bek yumi i pas long Krai.

Hanmak bilong Holi Spirit.

Yumi save pinis olsem, God i no inap daunim yumi i pas long Krai Jisas. (*Lukim Sande Baibel Toktok "God i no save daunim yumi i pas long Jisas" wantaim "Tupela kain lo i stap".*) Tasol, hau na bai yumi save olsem yumi pas long Krai Jisas? Sapos yumi lukim wok bilong Holi Spirit insait long laip bilong yumi, orait yumi ken save olsem Holi Spirit i stap insait long yumi, na dispela i minim olsem, God i bin pasim yumi long Krai Jisas. Skelim tok bilong Aposel Pol long **Rom 8:5-11**.

⁵ Manmeri i wokabaut long laik bilong olupela bel ol i gat strongpela tingting long bihainim laik bilong olupela bel. Tasol manmeri i wokabaut long laik bilong Holi Spirit ol i gat strongpela tingting long bihainim laik bilong Holi Spirit. ⁶ Tingting bilong sin manmeri em i tingting bilong i dai. Tasol tingting bilong manmeri Holi Spirit i bosim em i tingting bilong laip na bel isi. ⁷ Tingting bilong sin manmeri em i pait long God. Long wanem, em i no laik i stap aninit long lo bilong God, na tu, em i no inap i stap aninit long lo bilong God. ⁸ Ol manmeri we olupela bel i save bosim ol, ol i no inap tru long mekim pasin God i save laikim.

⁹ Tasol olupela bel i no save bosim yupela. Nogat. Holi Spirit i save bosim yupela, sapos Spirit bilong God i stap long yupela. Na manmeri i no gat Spirit bilong Krai i stap long em, orait em i no bilong Krai. ¹⁰ Tasol Krai i stap insait long yupela. Sin i bin wok insait long yupela na long dispela as bodi bilong yupela bai i dai. Tasol God i mekim wok pinis bilong kolim yupela "stretpela man", na long dispela as Holi Spirit i kamapim laip long yupela. ¹¹ God i bin kirapim Jisas long dai, na Spirit bilong dispela God i stap insait long yupela. Em olsem na dispela God i bin kirapim Jisas, Em bai givim laip long bodi bilong dai bilong yupela. Em bai mekim olsem long strong bilong Spirit bilong Em i stap pinis insait long yupela. **Rom 8:5-11**.

Holi Spirit i no save kam i stap long laip bilong manmeri na sindaun nating, nogat. Holi Spirit i gat wok, na taim Em i kam i stap insait long laip bilong manmeri, orait Em i save mekim wok bilong Em.

Holi Spirit i save kamapim laip long manmeri.

Na bikpela wok bilong Holi Spirit insait long laip bilong manmeri i olsem, Em i save kamapim laip long ol (lukim lain 10). God i bin mekim wok pinis long feitful wok bilong Jisas long diwai kros bilong mekim *sin manmeri* i kamap *stretpela manmeri* long ai bilong God. Em olsem na, Holi Spirit i save kamapim laip long manmeri bai manmeri i ken i save long dispela samting God i bin wokim bilong ol long feitful wok bilong Jisas. Dispela i minim olsem, Holi Spirit i save opim ai na ia na bel bilong manmeri na Em i givim bilip long manmeri, bai manmeri i ken i save na manmeri i ken i bilipim na trastim tru dispela wok Jisas i bin mekim long diwai kros bilong stretim ol long ai bilong God.

Holi Spirit i save kamapim *trupela bilip* long manmeri.

Olsem na, sapos Holi Spirit i bin mekim wok insait long yumi olsem, orait yumi no inap trastim wok yumi yet i save mekim, nogat. Yumi bai trastim wok God i bin mekim long feitful wok bilong Jisas Krai long diwai kros. Holi Spirit i wok insait long laip bilong yumi bilong kamapim *trupela bilip* we yumi save trastim God long kisim bek yumi long feitful wok Jisas Krai i bin mekim bilong yumi.

Holi Spirit i save kamapim nupela pasin long manmeri.

Na taim Holi Spirit i kamapim laip long yumi na Em i senisim tingting bilong yumi na Em i givim nupela tingting na nupela bilip long yumi, orait dispela nupela laip na tingting na bilip i wok long kamapim nupela pasin long laip bilong yumi, na dispela nupela pasin em i pasin God i save laikim (lukim lain 5-8).

Dispela nupela pasin i kamap long laip bilong yumi em i no mekim yumi i stap stret long ai bilong God bai God i ken i kisim bek yumi. Nogat tru! Wok Jisas i wokim i mekim yumi i stap stret long ai bilong God na God i kisim bek yumi long wok Jisas i bin wokim bilong yumi. Em olsem na nupela pasin i kamap long laip bilong yumi em i hanmak bilong Holi Spirit na em i pasin God i laik lukim long laip bilong yumi i pas long Krai Jisas.

God i pasim yumi long Krai Jisas.

Jisas i bin wokim wok bilong mekim yumi i stap stretpela long ai bilong God, na Holi Spirit i opim ai na ia na bel bilong yumi bai yumi bilipim na trastim feitful wok bilong Jisas. Taim yumi bilipim na trastim feitful wok bilong Jisas, taim yumi bilipim na trastim God long kisim bek yumi long feitful wok bilong Jisas, orait nupela pasin i wok long kamap long laip bilong yumi, em ol pasin God i laik lukim long laip bilong ol manmeri i pas long Krai Jisas.

Sapos yumi lukim hanmak bilong Holi Spirit long laip bilong yumi olsem, orait yumi ken i save olsem, God i bin pasim yumi long Krai Jisas, na long dispela as yumi pas long Krai Jisas.

Yumi i pas long Jisas yumi ken i amamas.

Sapos Holi Spirit i stap insait long laip bilong yumi olsem, orait yumi ken i amamas. Long wanem? Yumi save olsem, yumi pas trutru long Krai Jisas, na God i no inap daunim yumi i pas long Krai Jisas. Wok bilong Jisas i mekim yumi fri olgeta long lo bilong sin na dai na long dispela as God i no inap daunim yumi. **(Rom 8:1-2.)** Tok tenkyu long God (Papa God, Jisas na Holi Spirit) na litimapim nem bilong Em!

Paps bilong yumi.

Yu save, femili bilong yumi em i wanpela bikpela samting stret bilong yumi, a? Ating yumi ken i tok olsem, femili em i nambawan samting bilong yumi olgeta manmeri. Yumi save laikim femili bilong yumi tumas. Na dispela em i gutpela. Femili em i gutpela samting.

Long **Rom 8:12-17** aposel Pol em i stori long femili bilong God na dispela femili i winim ol femili bilong yumi long dispela graun.

Long feitful wok bilong Jisas long diwai kros God i bin stretim pe bilong sin bilong ol planti manmeri, na Holi Spirit i kam long ol na Em i opim ai na ia na bel bilong ol, bai ol i ken i save long feitful wok bilong Jisas. Holi Spirit i mekim wok long bel bilong ol, bai ol i ken i save olsem, God i adoptim ol na God i kisim bek ol long feitful wok bilong Jisas long diwai kros. Holi Spirit i mekim wok olsem long laip bilong ol, na long dispela as, ol i tanim bel na ol i bilipim na trastim feitful wok bilong Jisas long diwai kros na ol i pas long Em. (Lukim *Sande Baibel Toktok* na lukim "*Hanmak bilong Holi Spirit*".)

Long femili bilong God ol pikinini bilong God i save kolim God "Papa". Long wanem, God Em i Papa bilong ol pikinini bilong Em long femili bilong Em. Lukim tok bilong aposel Pol long **Rom 8:12-17** wantaim **Efesus 1:4-5**.

¹² Ol brata, nau dispela tok mi mekim em i mas holim yumi. Yumi no ken i wokabaut long laik bilong olupela bel. Nogat. ¹³ Sapos yupela wokabaut long laik bilong olupela bel yupela bai dai. Tasol sapos long strong bilong Holi Spirit yupela i wok long mekim sin pasin i dai long bodi bilong yupela, orait yupela bai i stap laip. ¹⁴ Long wanem, manmeri i save bihainim stia bilong Spirit bilong God em i pikinini bilong God. ¹⁵ Olsem na, Holi Spirit Em i no kam long yupela bilong mekim yupela pret gen. Nogat. Holi Spirit Em i Spirit bilong mekim manmeri i kamap pikinini bilong God. Na Em yet i mekim yumi singaut, "Aba! Papa!" ¹⁶ Holi Spirit Em i pas wantaim yumi yet na dispela i save soim yumi olsem yumi pikinini bilong God. ¹⁷ Na sapos yumi pikinini bilong God, orait ol samting God i laik givim Krai yumi tu bai kisim. Em olsem tasol yumi mas kisim hevi wantaim Krai pastaim, na bihain yumi bai sindaun wantaim Em long glori bilong Em. **Rom 8:12-17**

Em [God] i bin lavim yumi. ⁵ Na long dispela as Em bin i makim yumi bilong adoptim yumi na mekim yumi kamap pikinini bilong Em long wok Jisas Krai i mekim. **Efesus 1:4-5**.

Na yumi save long pasin bilong adoptim pikinini. Sapos yu adoptim wanpela pikinini, orait dispela i minim olsem yu kisim em i kam insait long femili bilong yu yet, na bai yu lukautim em olsem yu yet i karim em.

Long ples bilong mipela (ol wait) taim mipela laik adoptim pikinini, orait mipela mas sainim ol pepa na mipela adoptim pikinini. Na taim mipela sainim pepa pinis, orait nau pikinini em i pikinini bilong mipela stret, na wanpela manmeri i no inap kam kisim bek. Nogat. Pepa i tok pinis olsem pikinini i bilong mipela tasol.

Em olsem na God Em i adoptim ol wanwan manmeri na Em i mekim ol i stap pikinini bilong Em na Em i stap Papa bilong ol. Dispela i olsem God i sainim olgeta pepa na Em i adoptim ol. Wankain olsem yumi adoptim pikinini, em nau, God Em i adoptim ol na Em i mekim ol pikinini bilong Em na Em i stap Papa bilong ol.

Sapos yumi bilipim na trastim God long kisim bek yumi long feifful wok bilong Jisas tasol, na yumi pas long Jisas, orait yumi ken i save olsem, Holi Spirit i bin opim ai na ia na bel bilong yumi na yumi pas long Jisas, na yumi ken i klia olsem, yumi pikinini bilong God na God Em i Papa bilong yumi na yumi singaut olsem, "Papa".

God Em i "Paps" bilong yumi na yumi no ken i pret moa.

Yu save, taim God Em i adoptim yumi na taim Holi Spirit i opim ai ia bel bilong yumi na yumi pas long Jisas, orait God i bin mekim Em yet i kamap "Paps" bilong yumi. Em i mekim Em yet i kamap "Dedi" bilong yumi, Papa bilong yumi.

God Em i bikpela Jas bilong ol manmeri i givim baksait long Em na i trastim strong bilong ol yet. Bihain God bai mekim save long ol. Tasol God Em i *no* Jas bilong yumi i pas long Jisas. Nogat! God Em i "Paps" bilong yumi i pas long Jisas. Em i "Dedi" bilong yumi i pas long Jisas. Yumi no ken i pret moa long God na long bikpela kot bilong bihain. Long wanem? God Em i *no* Jas bilong yumi moa. Nogat. Nau Em i Paps bilong yumi, nau Em i "Dedi" bilong yumi na yumi pikinini bilong Em. (Lukim lain 15-17.)

Yumi i pas long Jisas yumi pikinini bilong God na bai yumi kisim olgeta samting Papa i laik givim Jisas. Yumi femili bilong God na samting Jisas i kisim, orait yumi tu bai kisim. Em olsem na, bihain bai yumi sindaun insait long glori bilong Jisas wantaim Jisas.

God i givim Holi Spirit long ol pikinini bilong Em, bai ol i ken i save long olgeta wok God i bin mekim long feifful wok bilong Jisas bilong kisim bek ol na bilong adoptim ol. God Em i Paps bilong ol na ol i pikinini bilong Em, na Holi Spirit i wok long givim ol dispela tingting long ol, bai ol i no ken i pret moa.

God Em i "Paps" bilong yumi na yumi kisim pasin bilong Em.

Lukim lain 12-14. Femili trutru bilong yumi i pas long Jisas em i narapela femili nau na paps bilong yumi Em i narapela "Paps". Femili bilong yumi em i no ol lain bilong ples. Paps bilong yumi em i no wanpela man bilong ples. Nogat. Trupela Paps bilong yumi i pas long Jisas Em i God na trupela femili bilong yumi em i femili bilong God. Long dispela as yumi no ken i bihainim moa ol pasin bilong ples.

Paps Em i no adoptim yumi bilong yumi ken i pas yet long olupela paps na long olupela femili bilong yumi. Nogat. Yu tingim. Sapos yu adoptim wanpela pikinini na yu mekim gutpela wok long em na yu baim skul fi bilong em na yu givim kopi long em na yu lukautim em gut, tasol em i givim baksait long yu na em i hangre tumas long olupela paps na olupela femili bilong em, orait ating yu no inap amamas, a? Na wankain olsem. God Em i adoptim yumi na Em i Paps bilong yumi na long dispela as yumi mas tanim fes bilong yumi i go long Em na bihainim stia bilong Holi Spirit bilong Em.

Pasin bilong bihainim stia bilong Holi Spirit em i no rot bilong God i kisim bek yumi.

God i no kisim bek yumi na adoptim yumi bikos yumi bihainim stia bilong Holi Spirit. Nogat. God i kisim bek yumi pinis long feifful wok bilong Jisas long diwai kros. Holi Spirit i opim ai na ia na bel bilong yumi, bai yumi ken i save long rot bilong God i kisim bek yumi na yumi bilipim na trastim Jisas. Long dispela as yumi pas long Jisas na yumi bihainim stia bilong Holi Spirit.

Pasin bilong bihainim stia bilong Holi Spirit em i no rot bilong God i kisim bek yumi. Nogat. Em i mak bilong manmeri God i kisim bek pinis. Em i hanmak bilong wok bilong God long laip bilong ol pikinini bilong Em.

Tru, yumi feil manmeri na sampela taim bai yumi feil long bihainim gut stia bilong Holi Spirit. Em olsem, tasol, long bel bilong yumi, Holi Spirit bai skulim yumi olsem, "God i kisim bek yu long feifful wok bilong

Jisas tasol, olsem na yu no ken i pret. Yu kirap na yu bihainim stia bilong Mi i go yet na yu wok yet long daunim sin long laip bilong yu.”

Em i Holi Spirit i mekim yumi singaut long Paps bilong yumi na yumi litimapim nem bilong Em na yumi tok tenkyu long Em long olgeta wok Em i bin mekim long feitul wok bilong Jisas bilong karamapim sin na feil bilong yumi. Dispela wok bilong Holi Spirit i strongim yumi long bihainim stia bilong Holi Spirit moa, na i strongim yumi long wok moa long daunim sin long laip bilong yumi. Na dispela i soim olsem Holi Spirit i stap insait long laip bilong yumi, na yumi pikinini bilong God.

Em olsem na, yumi i pas long Jisas, yumi no pret moa, na yumi wok long bihainim stia bilong Holi Spirit. Yumi amamas bikos yumi save olsem God i no save daunim manmeri i pas long Jisas.

Bai yumi kisim hevi.

Planti manmeri, taim ol i “tanim bel” na ol i pas long wanpela lotu na kisim baptais, orait ol i tingim olsem, God bai mekim olgeta sindaun bilong ol i kamap gutpela. Em olsem na, ol i tingim olsem, ol i no inap lukim hevi, na gaden bilong ol bai kamapim gutpela kaikai, na kopi bilong ol bai karim hevi kopi, na pikinini bilong ol i no inap kisim sik. Ol i tingim ol bai kisim ol kainkain gutpela sindaun olsem.

Yu save, ol i holim bilip olsem, manmeri i harim lotu, orait God bai givim gutpela sindaun long ol, na manmeri i no harim lotu, orait ol bai lukim kainkain hevi. Na yumi harim pinis nek bilong manmeri i holim dispela kain bilip. Taim pikinini bilong wanpela manmeri i kisim skebis o ol narapela kain sik, orait ol sampela manmeri bai tok, “Papamama i wokim sampela pasin nogut na long dispela as pikinini i kisim sik.”

Na yumi i bilipim na trastim God long kisim bek yumi long feitul wok bilong Jisas long diwai kros, ating yumi tu yumi ken i kisim kain tingting olsem ol planti manmeri na yumi tingim olsem, “Mi tanim bel trutru na mi bilipim na trastim feitul wok bilong Jisas, orait nau mi no inap lukim ol kainkain hevi.” Na taim yumi lukim sampela hevi, orait yumi pret na yumi tingim olsem, God i kisim bek fogivim bilong Em na yumi lus gen.

Tasol, God i no tok olsem, “Sapos yu tanim bel na bihainim Mi, orait yu bai kisim gutpela sindaun na olgeta samting bilong yu bai kamap gutpela.” Nogat. Lukim tok aposel Pol i mekim long **Rom 8:17**.

¹⁷ Na sapos yumi pikinini bilong God, orait ol samting God i laik givim Krai yumi tu bai kisim. Em olsem tasol yumi mas kisim hevi wantaim Krai pastaim, na bihain yumi bai sindaun wantaim Em long glori bilong Em. Rom 8:17.

Yumi i bilipim na trastim God long kisim bek yumi long feitul wok bilong Jisas long diwai kros, yumi i stap pikinini bilong God na Holi Spirit i stap insait long laip bilong yumi, God i tokim yumi olsem, yumi mas kisim hevi *pastaim* na bihain yumi bai kisim gutpela sindaun insait long olgeta bikpela na gutpela samting bilong Jisas. Aposel Pol i skruim tok long **Rom 8:18-25**.

¹⁸ Taim mi tingting long glori God bai soim yumi long bihain, mi save tingim olsem ol hevi nau yumi save pilim em i liklik samting tumas. ¹⁹ God i bin wokim ol samting antap na Em i wokim dispela graun, na ol dispela samting i strong long wetim taim we ol pikinini bilong God i kamap ples klia. ²⁰⁻²¹ Ol samting antap na ol samting bilong dispela graun ol tu i save pilim hevi bilong sin. Ol i no mekim wanpela rong na kisim dispela hevi. Nogat. God i putim ol dispela samting insait long hevi bilong sin. Tasol ol dispela samting i no inap i stap olsem i go i go. Nogat. Bihain, ol dispela samting bai fri long hevi bilong sin na dai, na ol bai kam insait long glori bilong God wantaim ol pikinini bilong God. ²² Yumi save ol samting bilong antap na ol samting bilong dispela graun i pilim hevi kain olsem meri i pilim hevi taim em i laik karim pikinini. Na ol i pilim dispela hevi i kam i kam long nau. ²³ Em i no dispela samting tasol i pilim hevi i go i go. Nogat. Yumi we Holi Spirit i karim sampela kaikai pinis long laip bilong yumi, yumi tu i pilim olsem. Em olsem na yumi save pilim hevi bilong sin na yumi strong long wetim taim we God bai kamapim nupela bodi bilong yumi. Na taim bodi bilong yumi i kamap nupela, em nau yumi kamap pikinini bilong God olgeta. ²⁴ Taim God i kisim bek yumi, yumi bin tingting strong long dispela samting God i laik mekim long bihain. Yumi no kisim yet, olsem na yumi tingting strong long ol dispela samting. ²⁵ Tasol sapos yumi no kisim yet, orait yumi mas bel isi i stap na wetim ol dispela samting yumi tingting strong long kisim. Rom 8:18-25

Aposel Pol i mekim ol dispela tok long yumi i bilipim na trastim God long kisim bek yumi long feitful wok bilong Jisas long diwai kros tasol. Pol i tok, yumi we Holi Spirit i karim sampela kaikai pinis long laip bilong yumi, yumi tu bai lukim na kisim ol hevi i save holimpas dispela graun.

Yumi ken kisim hevi bilong sin wantaim olgeta manmeri bilong dispela graun.

Taim Adam na Iv i kamapim sin, orait long dispela taim God i kamapim hevi bilong sin long dispela graun, na dispela hevi i kam i kam na i holimpas yumi tu. Ol kankain sik em i hevi bilong sin. Taim yumi wok na yumi pilim tuhat na yumi pilim pen, orait dispela em i hevi bilong sin. Sori na kraik em i hevi bilong sin. Ol dispela kankain samting i olsem hevi bilong sin. Na taim Jisas i stap long dispela graun, orait Em tu i bin lukim na pilim dispela kain hevi. Jisas i no mekim wanpela sin, tasol Em i lukim na pilim hevi bilong sin i holimpas olgeta samting bilong dispela graun.

Hevi Jisas i kisim, orait yumi ken i kisim tu.

Ol planti haiden manmeri wantaim ol planti lotu manmeri ol i bin daunim Jisas nogut tru. Ol i hetim Jisas, na ol i tok bilas long Jisas, na ol i wok long painim rot bilong kilim Em i dai. Jisas Em i lait i kam long dispela graun, tasol tudak bilong dispela graun i bel nogut olgeta long Em. Na yumi i pas long Jisas yumi tu bai fesim dispela kain hevi. Lukim Jon 15:18-20.

¹⁸ Na Jisas i skruim tok olsem, "Sapos ol manmeri bilong dispela graun i mekim birua long yupela, orait yupela mas holim tingting olsem, pastaim ol i bin mekim birua long mi tu. ¹⁹ Ol manmeri bilong dispela graun ol i save laikim ol manmeri bilong ol yet. Olsem na, sapos yupela i pas long ol manmeri bilong dispela graun, orait ol bai laikim yupela. Tasol, yupela no bilong ol manmeri bilong dispela graun. Nogat. Mi makim yupela pinis bai yupela i stap narapela lain. Long dispela as ol manmeri bilong dispela graun ol i save mekim birua long yupela. ²⁰ Holim tingting long wanpela tok mi givim yupela pinis, na dispela tok i olsem, 'Wokman i no winim bikman bilong em.' Sapos ol i bin mekim nogut long mi, orait ol bai mekim nogut long yupela tu. Na sapos ol i bihainim tok bilong mi, orait ol bai bihainim tok bilong yupela tu. ²¹ Tasol, ol i no save long Papa, Em i bin salim Mi na Mi kam. Olsem na, ol bai mekim pasin nogut long yupela olsem ol i bin mekim long Mi, long wanem, yupela bilong Mi. Jon 15:18-20.

Taim yumi bihainim stretpela pasin, na taim yumi lusim kastem pasin bilong ples na yumi bihainim kastem pasin bilong God, orait long dispela taim ol manmeri long ples ol i ken givim hevi long yumi.

Taim ol sampela manmeri na ol sampela lotu manmeri i tok baksait long yumi na tok giaman bilong daunim yumi, orait yumi mas klia olsem, dispela i no nupela samting i kamap. Nogat. Dispela kain pasin i stap longtaim pinis. Jisas i bin kisim ol dispela kain hevi, na yumi tu bai kisim. Yumi no ken i saprais long dispela samting.

Yumi ken i amamas na yumi karim hevi Jisas i bin karim.

Lukim tok bilong Jisas long **Matyu 5:10-12**.

¹⁰ **God i blesim manmeri i laik bihainim ol stretpela tingting na ol stretpela pasin, na long dispela as ol man ol i bagarapim em. Olsem na, kingdom bilong heven em i bilong dispela kain manmeri.**
¹¹ **“God i blesim yupela taim yupela bihainim Mi na ol man ol i tok nogut long yupela na i wok long bagarapim yupela na i sutim kainkain tok giaman long yupela. ¹² Long bipo ol man ol i bin mekim kain pasin olsem long ol profet i kamap paslain long yupela. Olsem na, taim ol man ol i mekim kain pasin olsem long yupela, orait yupela ken i amamas i stap. Long wanem, God bai givim gutpela samting long yupela long heven. Matyu 5:10-12.**

Ol manmeri i pas long Krais, pastaim ol bai safa na kisim hevi long laip bilong ol. Tasol, bihain ol bai kisim ol bikpela na gutpela blesim bilong heven. Em olsem na, ol i save tingim ol dispela bikpela na gutpela blesim bilong heven ol bai kisim long bihain, na dispela i save strongim ol, na ol i stap bel isi, na ol i no tingting planti tumas long ol hevi nau ol i save kisim.

Em olsem na, taim kainkain hevi i kamap long yumi, orait yumi no ken tingting planti long dispela. Yumi save olsem, yumi mas kisim hevi pastaim. Na bihain yumi bai lukim na kisim olgeta bikpela na gutpela samting wantaim Krais.

Yumi no i stap wanpis.

Yumi i bilipim na trastim God long kisim bek yumi long feifful wok bilong Jisas long diwai kros tasol, na yumi bihainim Jisas, orait yumi save pinis olsem, yumi mas kisim hevi pastaim na bihain God bai kisim yumi i go insait long glori bilong Em. (Lukim Rom 8:17.)

Tasol, taim yumi kisim hevi, God i pasim ai long yumi na Em i no kea long yumi, a? Em i no kea long wanem hevi yumi pilim, a? Taim ol raskol i stilim kopi bilong yumi, God Em i kea o nogat? Taim man bilong yu i paulim ol meri nabaut na em i maritim narapela meri na yu pilim hevi tru long dispela, God Em i kea o nogat? Taim pikinini bilong yumi i kisim bikpela sik na em i laik i dai, God Em i kea o nogat? God Em i kea taim yumi kisim ol kainkain hevi o nogat?

Long **Rom 8:26-27** God i laik strongim yumi na Em i laik tokim yumi olsem, “Yes, yupela pikinini bilong Mi, na yupela bai kisim hevi, tasol yupela no ken tingim olsem yupela i stap wanpis, nogat, Holi Spirit i stap bilong helpim yupela.” Em olsem na God i tok, “Yes, Mi kea.” Lukim **Rom 8:26-27**.

²⁶ Na tu, Holi Spirit i save helpim yumi. Yumi no gat strong, tasol Em i save helpim. Taim yumi laik prea yumi bai askim God long wanem samting? Yumi no save gut. Tasol Holi Spirit i pilim tru ol hevi bilong yumi, na dispela i dip tumas na i winim toktok, na Em i save karim hevi bilong yumi i go long God. ²⁷ God Em i klia long olgeta tingting bilong yumi na Em i klia long tingting bilong Holi Spirit. Olgeta taim Holi Spirit i save bihainim laik bilong God. Olsem na, taim Em i wok long askim God long helpim yumi, orait olgeta askim bilong Em i pas tru long laik bilong God. Rom 8:26-27.

Yumi no i stap wanpis.

God Em i kea long yumi. Em i save olsem, yumi no gat strong bilong karim ol kainkain hevi bilong dispela graun. Olsem na, Em i givim Holi Spirit long yumi bilong helpim yumi long hevi bilong yumi. Yumi no inap i stap wanpis tasol. Nogat. Holi Spirit i stap wantaim yumi na Em i save helpim yumi. God i no lusim tingting long yumi. Nogat tru.

Taim dai bilong Jisas i kam klostu, orait Em i bin tokim ol disaipel olsem, “Mi bai lusim yupela.” Na taim ol disaipel i harim dispela toktok ol i pilim hevi. Ating ol i pilim olsem, “Mipela i bin lusim misin bilong mipela na lusim wok bilong mipela bilong bihainim Jisas, olsem na, long wanem as nau Em i laik lusim mipela?” Ating ol i pilim olsem ol bai i stap wanpis na Jisas i no kea long ol.

Tasol, Jisas i bin tokim ol olsem, “Mi no inap larim yupela i stap olsem pikinini i no gat papamama i stap. Nogat. Mi no inap larim yupela i stap wanpis. Nogat. Mi bai givim Holi Spirit long yupela na Em bai i stap wantaim yupela bilong helpim yupela.” (Yu ken i lukim **Jon 14:15-21**.)

Holi Spirit i save helpim yumi.

Holi Spirit i stap insait long yumi i bilipim na trastim na bihainim Jisas na Em i klia long hevi bilong yumi na Em i karim hevi bilong yumi i go long God. Sampela taim yumi pilim bikpela hevi na dispela hevi i dip tumas na yumi hat long tokaut long dispela hevi. Olsem na, taim yumi laik prea long dispela samting em i hat tru

na yumi mekim mekim, tasol stil maus bilong yumi i hevi tumas long tokaut long hevi bilong yumi. Tasol, Holi Spirit Em i klia long dispela hevi, na Em i save karim dispela hevi i go long God.

Em olsem na yumi no ken i tingim olsem, God i no kea na God i no save long wanem kain hevi yumi save pilim. Nogat. Holi Spirit i save karim hevi bilong yumi long God.

Prea bilong Holi Spirit i save pas wantaim laik bilong God.

Taim Holi Spirit i askim God long sampela helpim bilong yumi, orait Em i klia long wanem kain helpim yumi nidim, na Em i askim God long rait samting bilong helpim yumi. Na God Em i amamas long givim dispela samting bilong helpim yumi. Na bikpela samting yumi nidim i olsem, yumi nidim God yet. God i laik yumi pas olgeta long Em na kisim trupela amamas bilong Em.

Yumi manmeri yumi pas pas tumas long ol samting bilong dispela graun na yumi no tingim God na yumi no pas gut long Em. Yumi tingim olsem yumi ken i kisim amamas long ol samting bilong dispela graun. Yumi stap olsem, tasol, taim ol kainkain hevi i kamap long yumi, orait God i yusim ol dispela hevi bilong tanim tingting bilong yumi i kam long Em yet, bai yumi ken i save moa long Em, na bai yumi lavim Em moa, na yumi pas moa long Em, na yumi trastim Em moa. Long dispela rot yumi bai kisim trupela amamas God i laik givim long yumi.

Ating, planti taim yumi laik God i rausim ol hevi bilong yumi na yumi sindaun long amamas bilong dispela graun. Tasol, God i yusim hevi bilong dispela graun bilong opim ai na ia na bel bilong yumi moa, bai yumi ken i save long Em moa, na bai yumi lavim Em moa. Em i mekim olsem bilong kisim yumi i kam long trupela amamas bilong God. Long wanem, dispela amamas i winim olgeta amamas.

God Em i gutpela God stret, na Em i no inap larim yumi i pas long olgeta samting bilong dispela graun na kisim giaman amamas. Nogat. Em i wok long tanim tingting bilong yumi i kam long Em yet, bai yumi save long Em na kisim amamas bilong Em. Holi Spirit i pas olgeta long dispela wok bilong God na Em i wok bilong helpim yumi save moa long God, bai yumi sindaun gutpela long lavim bilong God na kisim trupela amamas God i laik givim yumi.

God Em i kea long yumi.

Yumi i bilipim na trastim feiftful wok bilong Jisas, yumi i bihainim Jisas, yumi i trastim God long kisim bek yumi long feiftful wok bilong Jisas, orait, yumi save olsem, yumi bai fesim hevi pastaim na bihain yumi sindaun wantaim Jisas long heven. (Lukim Sande Baibel Toktok "*Bai yumi kisim hevi.*")

Tasol, sampela taim, taim yumi kisim ol sampela hevi, yumi tingim olsem, God i no kea long wanem kain hevi i kamap long yumi. Long **Rom 8:26-27** God i strongim yumi na i olsem Em i tokim yumi olsem, "Yes, yupela pikinini bilong Mi, na yupela bai kisim hevi, tasol yupela no ken i tingim olsem yupela i stap wanpis na Mi no kea, nogat, Holi Spirit bilong Mi i stap wantaim yupela bilong helpim yupela." God i pasim Holi Spirit long ol manmeri bilong Em bilong helpim ol. Em olsem na i olsem God i tok, "Yes, Mi kea." (Lukim Sande Baibel Toktok "*Yumi no i stap wanpis.*")

Nau bai yumi skelim ol sampela samting moa na yumi save moa long gutpela kea na lukautim bilong God. Tru, God Em i kea long yumi na Em i kea long ol hevi yumi save kisim. Tok bilong aposel Pol long **Rom 8:28-30** bai helpim yumi save moa long kea na lukautim bilong God.

²⁸ Na yumi save pinis, God i save bosim olgeta samting bilong mekim gut long ol manmeri i lavim Em, em ol manmeri God i singautim long laik na plen bilong Em. ²⁹ Bipo tru God i save tru long lain bilong Em, na Em i bin makim ol bilong mekim ol i kamap wankain olsem Pikinini bilong Em na bai dispela Pikinini i stap fesbon bilong planti brata. ³⁰ Na ol lain God i bin makim, Em i singautim ol. Na ol lain God i singautim, Em i givim stretpela pasin long ol na kolim ol "stretpela man". Na ol lain God i kolim "stretpela man", Em i kisim ol i kam insait long glori bilong Em. Rom 8:28-30.

Long dispela tok yumi ken i save long 3-pela samting:

1. God i bosim na kontrolim olgeta samting bilong mekim gutpela long yumi.

God Em i no inap mekim save long yumi na Em i no inap mekim nogut long yumi i pas long feiftful wok bilong Jisas. Nogat. God i yusim olgeta pawa na olgeta strong bilong Em na Em i bosim na kontrolim *olgeta samting* bilong *mekim gutpela* long yumi. God i bosim na kontrolim *olgeta samting*. Na Em i mekim olsem *bilong wokim ol gutpela gutpela samting* long yumi i pas long Em long rot bilong feiftful wok bilong Jisas long diwai kros.

Em olsem na, yumi ken i save olsem, God Em i bosim na kontrolim olgeta kainkain hevi i kamap long yumi. Em i mekim olsem bilong wokim ol gutpela gutpela samting long yumi. Ol kainkain hevi i no kamap long narapela rot. Nogat. Long pawa na strong bilong God tasol. Na ol kainkain hevi i no kamap bilong mekim save long yumi o bilong daunim yumi. Nogat. God Em i bosim na kontrolim ol kainkain hevi bilong mekim ol gutpela gutpela samting long yumi.

2. God i bosim na kontrolim olgeta samting bilong mekim yumi kamap olsem Jisas.

Sampela taim yumi tingim olsem, God i bosim na kontrolim olgeta samting bai yumi ken i kisim ol kainkain gutpela samting olsem gutpela sindaun, na gutpela marit, na gutpela pikinini, na gutpela kopi, na gutpela kago, na ol kainkain gutpela samting olsem. Tasol nogat. God i bosim na kontrolim olgeta samting bilong senisim yumi, bai yumi save long Em na yumi kamap kain manmeri olsem Jisas.

Yu save, tingting bilong yumi i go long wanpela rot, na tingting bilong God i go long narapela rot. Tingting bilong yumi manmeri bilong dispela graun i go long ol kago samting bilong dispela graun. Em olsem na, taim yumi tingim ol samting bilong God, orait tingting bilong yumi i go long ol kago samting bilong God.

Tasol God i no bisi long ol kago samting bilong dispela graun na Em i no bisi long ol kago samting bilong heven. Nogat. God Em i bisi long senisim ol lain bilong Em. Em i laik ol i save long Em na ol i kamap olsem Jisas. Gutpela samting trutru i olsem, yumi save long God na yumi kamap kain man olsem Jisas long bel bilong yumi na long wokabaut bilong yumi na bilong sindaun bilong yumi.

3. God i bosim na kontrolim olgeta samting bilong karim yumi seif i go long heven.

Yumi save olsem, God i yusim olgeta pawa na olgeta strong bilong Em bilong bosim na kontrolim olgeta samting. Em i mekim olsem bilong mekim gutpela long yumi na senisim yumi na mekim yumi kamap kain manmeri olsem Jisas yet.

Na God i yusim olgeta pawa na olgeta strong bilong Em bilong bosim na kontrolim olgeta samting bilong karim yumi seif i go long heven. God i no laik wanpela manmeri bilong Em i lus o i pundaun long rot. Nogat. God i bosim na kontrolim olgeta samting bai ol lain bilong Em i kamap seif long heven.

Em olsem na, Holi Spirit i singautim yumi. Holi Spirit i opim ai na ia na bel bilong yumi na yumi tanim bel na bilipim na trastim feifol wok bilong Jisas na yumi bihainim Em.

Long wok bilong Jisas long diwai kros God i kamapim rot bilong rausim na fogivim olgeta sin bilong yumi na bilong kolim yumi "strepela manmeri". Yumi no strepela manmeri. Nogat. Tasol wok bilong Jisas i mekim yumi kamap strepela manmeri long ai bilong God. Em olsem na Holi Spirit i opim ai na ia na bel bilong yumi bilong kisim yumi i kam long rot bilong Jisas.

Na God i mekim ol dispela samting bilong kisim yumi i go long ples bilong Em. Em olsem na i no gat kwesten mak long yumi. Nogat. Bai yumi sindaun wantaim Jisas long glori bilong Em. Long wanem, God i bosim na kontrolim olgeta samting bai yumi sindaun wantaim Jisas long glori bilong Em.

Sapos yumi yet yumi mas yusim strong bilong yumi yet na yumi sindaun wantaim Jisas long glori bilong Em, orait yumi no inap sindaun wantaim Jisas long glori bilong Em. Long wanem, yumi no gat strong bilong opim ai na ia na bel bilong yumi yet na yumi bilipim na trastim Jisas. Nogat. Na tu, yumi feil manmeri na yumi inap pundaun long rot. Long wanem, yumi no gat pawa na yumi no gat strong.

Tasol, olgeta tenkyu i go long God. Long wanem, God yet i gat pawa na i gat strong na Em i yusim olgeta pawa na strong bilong Em bilong bosim na kontrolim olgeta samting bilong kisim yumi i kam insait long femili bilong Em na bilong sindaunim yumi wantaim Jisas long glori bilong Em long heven.

Tru tumas, God Em i kea long yumi na Em i lukautim yumi. Kea na lukautim bilong God i moa moa moa yet. Em olsem na, yumi ken i stap bel isi na givim olgeta tenkyu i go long gutpela gutpela God bilong yumi.

Wanpela samting i no inap winim yumi.

Yumi manmeri i bilipim na trastim feitful wok bilong Jisas long diwai kros – yumi i bilip olsem, feitful wok bilong Jisas tasol i mekim yumi stretpela long ai bilong God, na God i kisim bek yumi long stretpela wok bilong Jisas tasol – yumi i bilip olsem, Jisas wanpela tasol Em i rot bilong God i kisim bek yumi na i no gat narapela rot – yumi i holim na bihainim dispela kain bilip, ating sampela taim yumi ken i tubel. Long wanem, long P.N.G. i gat planti manmeri i save toktok planti na toktok bilong ol i karamapim na i daunim dispela kain bilip.

Taim ol sampela manmeri ol i makim ol narapela samting em i rot bilong God i kisim bek yumi sin manmeri, orait dispela toktok i save karamapim na daunim trupela bilip long feitful wok bilong Jisas. Ol wanwan samting ol i makim i gutpela samting, tasol ol dispela samting i no rot bilong God i kisim bek yumi sin manmeri.

Pasin bilong baptais em i gutpela samting, tasol em i no rot bilong God i kisim bek yumi. Lo God i givim Moses em i gutpela samting, tasol em i no rot bilong God i kisim bek yumi. Pasin bilong stretim laip em i gutpela samting, tasol em i no rot bilong God i kisim bek yumi.

Em olsem na taim yumi tok, “Wok bilong Jisas long diwai kros tasol em i rot bilong God i kisim bek yumi,” orait sampela manmeri i sutim tok long yumi bilong kotim na daunim bilip bilong yumi. Sampela manmeri i tok olsem, “Yupela no trupela lotu na yupela lus lain tasol.”

Em olsem tasol yumi harim tok bilong God long **Rom 8:31-34**.

³¹ Orait, nau yumi bai tok wanem? Sapos God i mekim wok bilong helpim yumi, orait husat inap winim yumi? ³² God i no holim bek dispela wanpela Pikinini bilong Em. Nogat. Em i givim Em bilong helpim yumi olgeta. Olsem na, yumi ken i save, God Em i God bilong mekim grasia na Em bai givim ol narapela samting wantaim long yumi. ³³ Husat inap kotim ol manmeri God i bin makim? I no gat wanpela man inap mekim. Nogat. Em i God yet i bin givim stretpela pasin long ol na kolim ol “stretpela man”. ³⁴ Husat inap daunim ol lain bilong God? I no gat wanpela man inap mekim. Krais Jisas i bin i dai, na tu, Em i kirap gen na kisim laip. Em i stap pinis long han sut bilong God, na Em i save wok long askim God long helpim yumi. Rom 8:31-34.

Aposel Pol i putim 3-pela kwesten na 3-pela ensa bilong stiaim tingting na bel bilong yumi i bilipim na trastim God long kisim bek yumi long feitful wok bilong Jisas tasol. Yumi skelim dispela 3-pela kwesten wantaim ensa bilong em.

1. Husat inap winim yumi?

God yet i bin mekim wok bilong kisim bek yumi. Yumi no gutpela manmeri na yumi no mekim wanpela gutpela samting na God i kisim bek yumi. Nogat tru! Yumi manmeri bilong mekim pasin nogut tasol na God i kisim bek yumi. Em olsem na yumi ken i save olsem, God Em i God bilong mekim grasia.

Grasia em i pasin we God i givim bel na mekim gutpela pasin bilong helpim manmeri i bin mekim nogut long Em na i egensim Em na i daunim nem bilong Em. God i givim Jisas na Jisas Em i dai bilong rausim pe bilong

sin na bilong stretim yumi long ai bilong God, bai God i fogivim yumi na kisim bek yumi. Dispela wok bilong God em i grasia bilong God.

God Em i God bilong mekim grasia na Em i wokim ol bikpela bikpela wok pinis long yumi long wok bilong Jisas long diwai kros. Em olsem na wanpela samting i no inap winim na kapsaitim yumi i bilipim na trastim na bihainim Jisas.

2. Husat inap kotim yumi?

Yumi tok pinis olsem, God i givim Jisas na Jisas Em i dai bilong rausim na pinisim pe bilong sin, na long dispela rot Em i stretim yumi long ai bilong God, bai God i fogivim yumi na kolim yumi “stretpela manmeri” na kisim bek yumi.

God i wokim ol bikpela wok pinis bilong rausim na pinisim pe bilong sin, na long dispela as Em i no inap kotim yumi long sin bilong yumi. Kot bilong olgeta sin bilong yumi i pinis olgeta long ai bilong God. Na sapos God i no inap kotim yumi, orait husat i ken i kotim yumi? I nogat wanpela man na i no gat wanpela samting i ken i kotim yumi. Long wanem, God i pinisim pinis kot bilong olgeta sin bilong yumi i pas long Jisas na i pas long feifful wok bilong Jisas.

3. Husat inap daunim yumi?

Taim Jisas i kam long dispela graun ol manmeri nogut ol i laik rausim Jisas na ol i kilim Em i dai long diwai kros. Na taim Jisas i dai pinis, orait ol i tingim olsem ol i winim Jisas. Tasol nogat. Jisas i winim ol na Em i kirap bek long matmat na Em i sindaun wantaim God long heven.

Long dai na kirap bek bilong Jisas, Jisas i pinisim kot na pe bilong sin bilong yumi, na Jisas i stap wantaim God oltaim oltaim na em i dispela samting i helpim yumi na yumi i stap seif. Jisas i stap wantaim God na dai bilong Em i lukautim yumi oltaim oltaim oltaim. Long wanem, dai bilong Jisas i stretim yumi long ai bilong God.

Tru, sampela manmeri bai sutim tok long yumi bilong kotim na daunim na winim bilip bilong yumi. Tasol, husat inap winim God? Husat inap kotim God? Husat inap daunim God? Wanpela man na wanpela samting i no inap tru. Long dispela as wanpela man na wanpela samting i no inap winim o kotim o daunim yumi. Long wanem, God i wokim olgeta samting long feifful wok bilong Jisas bilong kisim bek yumi.

Tru, sampela manmeri bai toktok planti long ol narapela narapela rot. Tasol yumi no nidim ol narapela rot. Nogat. Jisas wanpela Em i rot bilong yumi. Yumi i pas long Jisas yumi seif olgeta long han bilong Jisas. Yumi seif olgeta long olgeta wok God i mekim long feifful wok bilong Jisas long diwai kros bilong kisim bek yumi. Em olsem na, yumi ken i stap strong na trastim Jisas na bihainim Jisas i go i go olgeta.

God i lavim ol manmeri Em i kisim bek.

Mi laik stori long wanpela pren bilong mi. Pren bilong mi i bin lusim lotu bilong em na em i laik pas long narapela lotu. Em olsem na, bihain, ol sampela lida bilong bipo lotu bilong em i kam long haus bilong em. Ol i sindaun long haus na ol lida i tokim pren bilong mi olsem, "Lukim. Mipela rausim nem bilong yu long buk bilong mipela, na dispela i minim olsem, mipela rausim nem bilong yu long Buk bilong Laip i stap long heven. Sapos yu kam bek long lotu bilong mipela, orait mipela ken i putim nem bilong yu i go bek gen. Tasol sapos yu no kam bek, orait yu bai lus olgeta."

Yu save, planti pret toktok i stap olsem ol lotu lida i bin mekim long pren bilong mi. Ol i toktok planti na ol i toktok strong. Na yumi harim toktok bilong ol i go i go na long bel bilong yumi, yumi tingting planti na yumi pret. Yumi tingim olsem, "Nogut ol i tok tru na yumi lus."

Tasol, ol i tok tru o nogat? Ol i gat strong bilong rausim nem bilong yumi long Buk bilong Laip o nogat? Ol i gat pawa bilong rausim yumi long han bilong Jisas o nogat? Sapos yumi bilipim na trastim feifful wok bilong Jisas, orait, wanpela samting i ken i rausim yumi long God na yumi lus gen o nogat?

Nau moning mi laik strongim yu na mi laik tokim yu olsem, God i save lavim ol manmeri Em i kisim bek, olsem na, wanpela samting i no inap separetim ol long Em. Lukim **Rom 8:35-39**.

³⁵ Husat inap rausim yumi long lavim bilong Krai? Ol kain trabel nabaut i ken i kamap, na ol kain hevi i ken i kamap, na ol kain bagarap i ken i kamap, tasol ol dispela kain samting i no inap tru long rausim yumi long lavim bilong Krai. Nogat. Na kaikai i ken i sot na klos i ken i sot, na samting nogut i ken i kamap, na pait i ken i kamap, tasol ol dispela kain kain samting i no inap tru long rausim yumi long lavim bilong Krai long yumi. ³⁶ Dispela kain tok i stap pinis long Buk bilong God, na i tok,

"Bilong Yu yet mipela i save kisim bagarap olgeta taim.

Ol i lukim mipela i olsem sipsip

bilong kilim i dai tasol. (Buk Song 44:22)

³⁷ Maski wanem kain samting i kamap long yumi Krai i save lavim yumi tru na long dispela as yumi bai winim olgeta kain kain trabel. ³⁸ Mi klia pinis long dispela. Wanpela samting i no inap tru long rausim yumi long lavim bilong Krai. Dai na laip i no inap. Ol ensel na ol spirit nogut i no inap. Ol samting bilong nau na ol samting bilong bihain i no inap. Na bikpela strong bilong wanpela samting i no inap. ³⁹ Ol samting bilong antap na ol samting bilong daunbilo i no inap. God i save lavim yumi tru na Em i soim yumi lavim bilong Em long wok bilong Krai Jisas Bikpela bilong yumi. Olsem na, i no gat wanpela samting God i bin wokim inap tru long rausim yumi long dispela bikpela lavim bilong God. Rom 8:35-39.

Yumi mas klia olsem, ol manmeri God i kisim bek pinis, orait God i lavim ol. Pastaim God i lavim ol na long dispela as Em i wokim olgeta samting bilong kisim bek ol. God i lavim ol na Em i salim Jisas i kam na Jisas i dai long diwai kros bilong rausim na pinisim pe bilong sin bilong ol. God i lavim ol na Em i salim Holi Spirit i kam bilong opim ai na ia na bel bilong ol, bai ol i ken i tanim bel na bilipim na trastim feifful wok bilong Jisas, bai ol i bilipim na trastim God long kisim bek ol long feifful wok bilong Jisas tasol.

Long dispela rot God i stretim yumi long ai bilong Em yet, bai yumi i stap stretpela manmeri bilong Em long femili bilong Em. Yumi no stretpela manmeri long wokabaut na sindaun bilong yumi. Nogat. Tasol, Jisas i

kisim na pinisim pe bilong sin bilong yumi pinis, na gutpela pasin bilong Jisas i karamapim nogut pasin bilong yumi, na long dispela as yumi i stap stretpela manmeri long ai bilong God.

God i lavim yumi pastaim na long dispela as God i wokim olgeta samting bilong kisim bek yumi. Na yumi mas save olsem, wanpela samting i no inap separetim yumi long lavim bilong God. Wanpela man i no inap, wanpela samting long dispela graun i no inap, wanpela samting bilong narapela hap i no inap, wanpela wokman bilong Seten i no inap, Seten i no inap. Tru tumas, wanpela samting i no inap tru long separetim ol manmeri God i lavim na i kisim bek long lavim bilong God.

Skelim tok bilong Jisas long **Jon 10:27-30**. Sipsip bilong Kraus em i ol manmeri God i kisim bek long feitful wok bilong Jisas long diwai kros. Ol i bilipim na trastim feitful wok bilong Jisas na ol i pas long Jisas. Ol i stap long han bilong Jisas na Jisas i lukautim ol na karim ol i go seif long Papa bilong Em long heven. Feitful wok bilong Jisas i lukautim ol sin manmeri i bilipim na trastim feitful wok bilong Em.

²⁷ Ol sipsip bilong Mi i save harim maus bilong Mi, na Mi save long ol, na ol i bihainim Mi. ²⁸ Mi givim laip i stap gut oltaim oltaim long ol, na ol bai i no inap lus. Wanpela man i no inap tru long rausim ol long han bilong Mi. ²⁹ Papa bilong Mi i bin givim ol long Mi, Em i winim olgeta samting, na wanpela man i no inap tru long rausim ol long han bilong Papa bilong Mi. ³⁰ Mi na Papa bilong Mi, Mitupela i wanpela. Jon 10:27-30.

Em olsem na, yumi no ken i pret long ol pret toktok ol sampela lida bilong ol sampela lotu i mekim. Nogat. Ol i no inap tru long rausim nem bilong yumi i bilipim na trastim feitful wok bilong Jisas. Long wanem, God yet i lavim yumi, na Em i kisim bek yumi long feitful wok bilong Jisas long diwai kros, na Holi Spirit i opim ai na ia na bel bilong yumi, bai yumi save na yumi tanim bel na bilipim na trastim na bihainim Jisas. Em olsem na, husat inap winim God na rausim yumi long lavim bilong God? Wanpela samting i no inap tru. Yumi seif olgeta long lavim bilong God.